

Concierto di Musica di Folklore ABC y exposicion
"Aruba di Antao"

Intercambio Cultural di Folklore di Aruba, Bonaire y Corsou



DEN cuadro di celebracion di 10 aña di existencia di Fundacion Mi Cutisa (FMC), lo organisa dia 14 y 15 di maart 2015 un Concierto di Musica di Folklore ABC y un exposicion "Aruba di Antao".

E exposicion lo ta alabez habri riba 18 di maart, durante un Feria Cultural cu lo bay tuma lugar na Cas di Cultura, for di 8.00 di mainta te cu 4.00 or di atardi. Meta di e celebracion aki ta, pa organisa un concierto cu musica di folklore di e tres islanan di habla Papiamentu di Caribe Hulandes.

Tambe t'e intencion pa trece tres cantante reconoci di e islanan ABC hunto, esta Ced Ride di Corsou, Wesley St. Jago di Bonaire y Jossy Brokke di Aruba.

Pa prome biaha na Aruba tur tres cantante lo bay presenta e musica di folklore cu tur tres e islanan tin en comun, esta nos wals, tumba, mazurka etc. Alabez pueblo di Aruba ta haya, pa prome bes den historia, e oportunidad pa aprecia e musica di folklore cu ta tipico di cada isla den un solo anochi.

E toke special di e concierto aki ta cu e musica di folklore di nos islanan lo keda presenta "den un bachi

nobo", cu instrumentonan adicional, areglo nobo y composicion nobo.

Banda di e Concierto di Folklore ABC, FMC ta organisa un exposicion pa laga e publico mira con antes na Aruba nos hendenan tabata decora nan cas y ki muebel y artefacto nan tabata usa pa haci esaki.

Lo presenta cada parti di e cas den forma di un "Show Case" y e instalacion aki lo fungi tambe p'e publico por saca potret bisti den trahenan tipico di Aruba, cu lo por huur dia 18 di maart na Cas di Cultura.

Varios organizacion cu ta traha riba tereno di cultura lo uni Dia di Himno y Bandera pa presenta nan mes n'e pueblo di Aruba paden y pafo di Cas di Cultura.

N'e Feria Cultural aki lo bay tin bendemento di boca dushi, cuminda crioyo, mata, buki y mucho mas. Tambe lo bay tin declamacion di poesia, presentacion di musica y exposicion di algun instrumento cu ta traha na Auba mes.

Entre otro algun bari di steelpan cu sr. Mario Lacle, mihor conoci como Mai Lac a traha y e lo duna un

demostracion con ta traha steelpan pa 11.00 or di mainta.

Fundacion Mi Cutisa a keda funda pa sra. Imelda Eckmeyer-Bermudez, dia 10 di maart 2005, kende tabata hopi conoci riba tereno di cultura na Aruba. FMC ta consisti di un directiva, un grupo di trabou y un grupo grandi di bolunatrio ambulante. Presidente di FMC ta Julianne Perez.

Meta di Fundacion Mi Cutisa ta, e.o., pa trece y organisa actividadnan cultural-educativo na Aruba.

Mirando cu e Concierto aki ta bay ta uno unico y pa bo no core e riesgo di keda afo, FMC ta pidi tur hende pa cumpra nan ticket tempran. Ced Ride ta presenta cu su banda tipico Folklore, Wesley St. Jago cu su banda Sabor Crioyo y Johnny Scharbaay hunto cu algun otro musico di Aruba lo compania Jossy Brokke.

Tur esaki pa un prijs simbolico, cu ta alabez un fundraising pa FMC por manda e grupo di Aruba n'e concierto ABC cu lo tuma lugar e aña aki na juli na Bonaire y na november na Corsou.